

**Bosna i Hercegovina  
Federacija Bosne i Hercegovine  
Tuzlanski Kanton  
OPĆINA KALESIJA  
OPĆINSKI NAČELNIK  
Služba za opću upravu,  
boračko invalidsku zaštitu i  
raseljena lica**

**INFORMACIJA  
O stanju kulture, fizičke kulture i informisanja na području  
općine Kalesija za 2014. godinu**

**Kalesija, juni 2015. godine**

## **UVOD**

Sport i kultura su društvene djelatnosti, koje su bitan činilac zdravog života i zajednički faktor, sportskog, kulturnog, odgojno-obrazovnog i privrednog razvoja Općine.

Sport i kultura su postali fenomeni savremenog društva, a događaji u sportu i kulturi prate se s velikom pažnjom i interesovanjem.

Evropska povelja o sportu i kulturi ističe ih činiocem ljudskog razvoja, značajnim sadržajem kulture i stvaralaštva, što upućuje na potrebu traženja organizovanih oblika i sadržajnih rješenja, kako bi se sport i kultura približili svim građanima, a posebno djeci i omladini koja, putem slobodnog izbora i vlastitog afiniteta, u njima nalazi prostor igre, učenja, zdravog i osmišljenog provođenja slobodnog vremena.

U savremenim uslovima života i rada sport i kultura su, sve više, izraženi kao društveno-kulturni fenomen i nezaobilazna potreba čovjeka u čijem se ishodištu nalazi zdravlje, kao bazični preduslov svake ljudske djelatnosti. Zdravlje, onako kako ga definišu pravila "Svjetske zdravstvene organizacije" koja podrazumjevaju određeni nivo razvijenosti tjelesnih sposobnosti, a ne samo odsustvo bolesti i iznemoglosti. Otuda je razvoj i unapređivanje tjelesnih kvaliteta stanovništva, naš trajni cilj.

U skladu sa zakonom o sportu Tuzlanskog kantona Općina Kalesija je dužna da sprovodi sportske aktivnosti na području svoje teritorije. To je do sada rađeno u saradnji sa Sportskim savezom Općine na realizaciji masovnijeg uključivanja školske djece u sport, organizovanja sportsko rekreativnih igara, podrške sportsko zabavnim aktivnostima kroz njegovanje historijskih i kulturnih tradicija stanovništva i podrške sportskim klubovima sa područja Općine.

Općina ima obavezu promovisanja sporta i kulture za sve građane od školskog, kvalitetnog do vrhunskog sporta. Osnovni cilj je da se iz sredstava budžeta sufinansira:

- ulaganje u razvoj mladih sportista ( školski sport, sport invalidnih lica, sportska rekreacija, sportska takmičenja, znanstveno istraživački rad u sportu );
- ulaganje u kulturna stvaralaštva ima za cilj očuvanje postojećeg nivoa kvalitete i podizanje iste na viši nivo, koja podstiče razvoj kulture i doprinosi jačanju ugleda naše Općine;
- podsticanje uključivanja što većeg broja građana u sport i kulturu.

## **FIZIČKA KULTURA**

### **- Male olimpijske igre:**

Male olimpijske igre koje se redovno svake godine organizuju pod pokroviteljstvom općine Kalesija, u periodu mart-maj, održane su i prošle godine. Na istim su učesće uzele sve osnovne škole sa području općine Kalesija. U ovom takmičenju, također, redovno se bilježe uspješni rezultati kako kolektivni tako i pojedinačni i u muškoj i u ženskoj konkurenciji. Prošle godine u manifestaciji Malih olimpijskih igara osnovnih škola u šahu, odbojci, košarci, stonom tenisu, atletici za muškarce i djevojčice i malom nogometu uzelo je učesće preko šest stotina djevojčica i dječaka. Ove godine najbolje škole u sportskim aktivnostima sa područja Općine Kalesija niti u jednoj disciplini nije imala prohodnost takmičenja na većem nivou. Razlog tome je nedostatak novca zbog čega se nisu mogla organizovati takmičenja na kantonalnom i federalnom nivou u okviru Malih olimpijskih igara kojima je uslov učesća na takmičenju, biti najbolji na općinskom nivou.

Također, ove godine nije bilo sportskih manifestacija u povodu Dana Općine iz poznatih razloga, prirodnih nepogoda, koje su uslovile poplave i klizišta na području naše Općine, zbog čega su sve sportske manifestacije otkazane kako bi se saučestvovalo sa građanima koji su pretrpjeli najveće štete nad svojim domovima i imanjima.

Međunarodni projekat manifestacije Otvorene zabavne škole fudbala ove godine nije sproveden zbog nedostatka sredstava. Ova značajna sportska manifestacija nije imala, dovoljno, kritičnu masu zainteresovanih za njeno održavanje na užem regionalnom području, tako da je on ostao ne realizovan. U dosadašnjoj praksi i tradiciji organizacije ove dječije sportske manifestacije ista je okupljala oko 200 učesnika sa područja Općine Kalesija i to iz Kalesije, Tojšića, Memića, Vukovija, Kikača, Rainaca Gornjih i Rainaca Donjih, predstavljajući tako svoje matične klubove i općinu. Cilj ove sportske manifestacije uvijek je bio da se okupi što više djece na jednom prostoru radi njihovog druženja, a istovremeno i da njihov talenat bude dostupan nogometnim stručnjacima koji prate ovaj projekat ili pak rade u njemu.

Slično ovoj sportskoj manifestaciji kalesijski sportski nogometni radnici su u dva navrata okupili preko 400 učesnika takmičenja i druženja djece u Kalesiji na Gradskom stadionu. Bila je to organizacija svojevrsne smotre malih nogometaša na jednom mjestu. Prvo je organizovan veliki nogometni turnir djece uzrasta od 10 do 14 godina života čiju je organizaciju predvodio Nogometni klub-škola fudbala "Respect" iz Kelesije, a potom je organizovano dječije prvenstvo Općine Kalesija u organizaciji NS Općine Kalesija koje ima svoj višestruki značaj za djecu, uzrasta 11 i 12 godina, okupljenih oko svojih registrovanih klubova. Projekat finansiranja takmičenja odvija se u saradnji NS Općine Kalesija s klubovima učesnicima takmičenja te putem sponzorskih sredstava pravnih i fizičkih lica, sredstava neposredne uplate klubova u vidu kotizacije i podrške Općine Kalesija iz sredstava za sport koja su dodijeljena Općinskom načelniku za pomoć klubovima i manifestacijama od značaja za Općinu Kalesija.

Kao i svake godine i minule je održan izbor najboljih sportista i sportskih kolektiva sa područja Općine Kalesija. U ovoj sportskoj manifestaciji za najbolje je konkurisalo preko 800 sportista, pojedinca i 12 sportskih klubova. Ocjenjivački žiri je odabrao 15 pojedinaca i 6 sportskih kolektiva kojima su dodijeljena priznanja za njihov doprinos ostvarenim sportskim rezultatima.

Školski sport u osnovnim školama kroz manifestaciju Malih olimpijskih igara u prošloj godini je dao izuzetno vrijedne sportske rezultate, a na nivou općine Kalesija sveukupni pobjednik bila je Osnovna škola Memići. Velika je šteta što u okviru ovog takmičenja osnovci nisu imali takmičenje na većem nivoe, jer je za ovu godinu otkazano

takmičenje Malih olimpijskih igara na nivou kantona zbog nedostatka novca koje je bilo dužno da obezbjedi Ministarstvo obrazovanja i kulture TK.

U izvještajnom periodu nije bilo prestanka rada sportskih klubova sa područja naše Općine. Svi su uključeni u sistem takmičenja svojih saveza u kojima se takmiče sa više ili manje uspjeha, međutim zadržavamo zabrinutost kada je u pitanju budućnost sporta na području lokalne zajednice. Kao i u prošloj godini tako je i u ovoj ostao smanjen broj sportista tinejdžerskog uzrasta u gotovo svim klubovima na području lokalne zajednice. Potrebna je analiza razloga zbog čega se dogodilo ovo smanjenje broja mladih u sportu. Analiza, istog stanja za prošlu godinu, govorila je o nezainteresovanosti djece za sport što sa sobom nosi jednu veliku opasnost od psihofizičkog zaostajanja djece. Klubovi iz prošle godine FK "Bosna" iz Kalesije, FK "Sloga" iz Tojšića, FK "Rainci Gornji", NK-ŠF "Respect" Kalesija i OK "Bosna" iz Kalesije nisu uspjeli nadoknaditi nedostatak mlađih kategorija koje su izgubili u prethodnoj godini. I dalje ne dostaje oko stotinu mladih u sportu, a bez njih u narednih deset godina bit će teško organizovati klubove.

Ovo stanje se zadržava i kod klubova koji preferiraju svoje takmičenje na individualnom-pojedinačnom takmičenju (van ekipno) gdje imamo drugu krajnost. Postoji hronični problem da u tom sportu na području naše lokalne zajednice nema starijih uzrasnih kategorija većih od juniora. Seniora nikad nije ni postojalo u ovoj grani sporta na našoj lokalnoj zajednici što je također zabrinjavajuće u razmišljanju djece o sportu i sportskim vrijednostima, kako njih samih, tako i njihovih klubova, a onda i sporta u cjelini.

Vrijeme je za reagovanje, odnosno za zaustavljanje ove drastične nezainteresovanosti za sport, sportski i psiho-fizički razvoj djece i buduće sportske afirmacije lokalne zajednice.

#### **- Radničke sportske igre:**

U skladu sa zakonom o lokalnoj samoupravi Općina Kalesija je dužna da organizuje i sprovodi sportske aktivnosti za radnike na području svoje teritorije.

U Julu su sprovedene Radničke sportske igre u odbojci, na kojima su svoje učešće uzeli radnici zaposleni u javnim i privatnim subjektima gdje je svoju sportsku rekreaciju imalo oko 100 uposlenika, radnika, iz (7) sedam Kalesijskih firmi.

U toku Septembra i Oktobra na programu su bile i Radničke sportske igre u malom nogometu na kojima je bilo prijavljeno (12) dvanaest ekipa, (oko 200 radnika).

#### **- Obilježavanje značajnih datuma i događaja:**

U ovoj godini organizovano je i sprovedeno 12 malonogometnih turnira, 2 u velikom nogometu, 1 košarkaški i 1 u sportskom ribolovu.

U sklopu obilježavanja Dana općine bilo je planirano da se sprovedu sportski programi ali zbog elementarnih nepogoda i proglašavanja vanredne situacije nisu održani i to: Atletska revija u krosu za učenike iz svih škola sa područja općine Kalesije, Memorijalni turnir u šahu, Odbojkaški turnir u organizaciji ŽOK Bosna Kalesija, i Memorijalni odbojkaški turnir te Kup Šehida općine Kalesija u fudbalu (koji je naknadno sproveden).

## ***SPORT***

Izvještaj sa ocjenom stanja u sportu općine Kalesija ima za cilj sagledavanja stanja u oblasti sporta na području naše općine i pregled osnovnih segmenata ove oblasti sa posebnim osvrtom na organizovanje sporta, stanje sportske infrastrukture, stručnih kadrova, takmičenja i rezultata u sportu.

### **1. Organizovanost sporta**

Polazeći od zadovoljavanja javnog interesa i potreba društva na nivou općine je organizovana i ostvarena aktivnost kroz institucije sporta, čime se zadovoljavaju potrebe svih učesnika na prostoru općine u sljedećem:

#### **a) Sportski savez općine**

Sportski savez općine je krovna organizacija u koji je udruženo 19 sportskih klubova, jedan savez i jedno sportsko društvo. Sportski savez u svom radu ima posebno za cilj da:

- priprema i predlaže planove i programe razvoja sporta u općini
- prati realizaciju planova i programa,
- predlaže normative i standarde zadovoljavanja potreba u sporta
- koordinira sa općinskim strukturama po pitanju sporta,
- stvara preduslove za organizovanje i provođenje jubilarnih, tradicionalni sportskih manifestacija.

Jedan od ciljeva Sportskog saveza je očuvanje školskih takmičenja, jer na taj način još više će mo omasovit sport i dati mu potrebnu dimenziju zainteresovanosti mladih za sportom, a samim tim i direktno uticati na zdravstveni razvoj djece i njihov afinitet na vrijeme otkrivati za neka veća sportska dostignuća.

#### **b) Sportske organizacije – klubovi**

Klubovi se na teritoriji općine udružuju u sportski savez općine da bi zadovolji i ostvarili svoja prava, a na osnovu normativnih akata općinskog saveza i na principu dobrovoljnosti. Svi klubovi jedne vrste sporta udružuju se u Strukovne saveze na nivou općine, koji su članice Sportskog saveza općine. Na nivou općine aktivno djeluje trenutno 21 klub, zastupljenih u 8 sportskih grana sa oko 1200 sportista.

### **2. Sportska infrastruktura-sportski objekti**

Za realizaciju programa u sportu, osnovna pretpostavka je da postoje sportski objekti i da je njihov prioritet optimalno korištenje i održavanje istih. Sportski objekti predstavljaju značajnu društvenu vrijednost i kao takvi su od posebnog interesa. Na području općine postoji 9 (devet) sportskih terena za veliki nogomet, 32 univerzalna mala sportska terena na kojima se mogu upražnjavati igre iz nogometne, rukometne, košarkaške i odbojkaške grane sporta. Za bavljenjem sportom i tjelesnim odgojem na području općine sve škole osim osnovne škole u Kalesiji imaju vlastite sportske sale. Potpuni završetak radova na Gradskoj dvorani je teško predvidjeti s obzirom na činjenicu restrektivne potrošnje sredstava na svim nivoima u državi koja se očekuje u većoj mjeri ove godine nego prethodne, međutim s obzirom na budžetski plan za ovu godinu i da su predviđena određena sredstva za nastavak radova na ovom

korisnom sportskom objektu za očekivati je da će biti urađeno bar u onoj mjeri koliko je planirano sredstava za isto.

Na području općine Kalesija nepromijenjen je broj velikonogometnih terena koji imaju svoju infrastrukturu po kojoj ranije urađeni tereni dobivaju izgled pravih nogometnih stadiona za niže nivoe takmičenja.

U Kikačima je ove godine adaptiran i bolje uređen teren nego što je ranije bio, a u punoj izgradnji je i proširenje svlačioničkog prostora s pratećim poslovnim prostorijama koji će klubu donositi određena prihodovna sredstva. Utrošena sredstva na promjeni cjelokupnog ambijenta na stadionu u Kikačima iznose oko 100.000,00 KM koje je u najvećoj mjeri doniralo građevinsko preduzeće TOM CAT iz Tuzle. Od toga je Firma UNIS TOK iz Kalesije imala donatorsko učešće u visini od 25% . Također i Općina Kalesija je pomogla obnavljanje stadiona u Kikačima sa oko 5% od ukupno navedenih sredstava, dok je Nogometni savez Bosne i Hercegovine preko Nogometnog saveza Tuzlanskog kantona obezbijedio oko 20 % sredstava iz fonda za poplavljena područja koja su dobivena od UEFA-e i FIFA-e.

U Tojšićima se nastavilo s dovršavanjem poslovnog objekta u okviru objekta za svlačionički prostor. Uloženo je novih sredstava za oko 100.000,00 KM koji će klubu omogućiti sticanje prihoda od ugostiteljske djelatnosti. Pored objekta, za ugostiteljstvo, na stadionu je rađen i projekat saniranja štete od majskih poplava. Najviše sredstava za poslovni objekat koji će klubu činiti dalju uspješnu egzistenciju obezbijedili su naši radnici iz dijaspore, mještani Petrovica Gornjih. Od toga je Općina Kalesija uložila 40% i vlastita ulaganja Kluba 10%. Za projekat saniranja šteta na stadionu od poplava Nogometni savez Bosne i Hercegovine je preko Nogometnog saveza Tuzlanskog kantona obezbijedio oko 20.000,00 KM iz fonda za poplavljena područja koja su dobivena od UEFA-e i FIFA-e. Zahvalno učešće u finansiranju navedenog projekta imala je i Holandska humanitarna organizacija "Ljudi rade za ljude".

Manje radove na uređenju stadiona u Vukovijama Gornjim za njegov prijem u većem rangu takmičenja izveli su i mještani MZ Vukovije Gornje gdje su za uređenje svlačioničkih prostorija, kabina za rezervne igrače i bezbjednosne ograde oko terena, utrošili oko 10.000,00 KM.

### **3. Stručni kadrovi**

Jedan od ključnih faktora razvoja sporta je stručni kadar. Problem s kojim se susrećemo je da u klubovima rade treneri bez trenerskog zvanja. Volja ljudi kao trenera postoji za edukacijom, međutim one su skupe i nepristupačne većini trenera na području naše općine. Isto tako imamo situacije da su nastavnici i profesori tjelesnog odgoja slabo zastupljeni u radu klubova, njihov angažman sveden je na minimum. Pored već navedenog, smatramo da moramo pronaći načina da se što više trenera školuje i da se mora organizirati što veći broj seminara da bi se ubrzala edukacija.

### **4. Takmičenja i rezultati u sportu**

Takmičenje je osnovna svrha sporta, motiv sportista za trening i odricanje, vodilja za ostvarenje cilja, do pobjedničkog postolja koje svaki sportista vidi u svojoj viziji uspjeha. Iza svakog uspjeha sportiste je veliko odricanje, mukotrpan trenažni proces, vrlo često u neadekvatnim uslovima rada i pritisnut bremenom finansijskih problema koji nažalost prati sve sportiste trenutno.

Sportisti i sportske ekipe općine su uključeni u sportska takmičenja na nivou Općine, Kantona, Federacije i na Državnom nivou.

- Nogomet

Nogomet je na području općine najmasovniji sport, i ima registrovanih 10 klubova od kojih je jedna velika škola fudbala koja se takmiči u konkurenciji mlađih uzrasta. Trenutno najviši rang takmičenja naših klubova je Druga liga Federacije Bosne i Hercegovina u kojoj se takmiče FK "Bosna" iz Kalesije i FK "Sloga" iz Tojšića. U Prvoj kantonalnoj nogometnoj ligi takmiče se FK "Rainci Gornji" iz Rainaca Gornjih, FK "Mladsot" iz Kikača, u Drugoj kantonalnoj ligi takmiči se FK "Krušik" iz Vukovija Gornjih, i "Mladost-78" iz Vukovija Donjih i u Trećoj kantonalnoj ligi takmiče se FK "Bjeljevac" iz Miljanovaca, FK "Memići" iz Memića i FK "Spreča" iz Rainaca Donjih.

- Odbojka

Odbojka je na našoj općini sport koji ima najbolji rezultat. Čine je dva kluba u konkurenciji jednog muškog odbojkaškog kluba i jednog ženskog. OK "Bosna" iz Kalesije je član premijer lige BiH i ŽOK "Bosna" iz Kalesije je član Prve odbojkaške lige FBiH.

- Košarka

Košarku u našoj općini čini jedan klub u muškoj konkurenciji koji se takmiči u konkurenciji pionira, kadeta i juniora na kantonalnom nivou.

- Karate

Karate borilačku disciplinu mladi naše općine upražnjavaju kroz članstvo u Karate klubu "Bosna-Kalesija" iz Kalesije i Karate klubu "SIGMA" iz Kalesije koji uzimaju učešće na državnim prvenstvima i kup takmičenjima kao i otvorenim međunarodnim turnirima.

- Kick box

Kick box kao sport borilačkih vještina sprovodi klub borilačkih sportova "Golden Team" iz Kalesije. Isti učestvuje u takmičenju na državnom prvenstvu, a u pojedinačnim nastupima i na međunarodnim takmičenjima.

- Sportski ribolov

Sportski ribolov je na našoj općini zastupljen preko Sportskog ribolovnog društva "Manjić" iz Kalesije. Ovo društvo ostvaruje takmičenje na svim nivoima od općinskog do svjetskog. Uzima učešće na svim prvenstvima i turnirima. Pored takmičarskog karaktera društvo ima i cilj ekološkog očuvanja rijeke Spreče u dijelu na kojem društvo djeluje.

- Šah

Jedan šahovski klub "Bosna" iz Kalesije je član Prve kantonalne šahovske lige.

- Sjedeća odbojka (Invalidni sport)

U sjedećoj odbojki naša općina se predstavlja preko Invalidnog kluba u sjedećoj odbojki "OKI" iz Kalesije koji se takmiči u Prvoj ligi Bosne i Hercegovine u sjedećoj odbojki. To je klub sastavljen od igrača invalida i uglavnom su to ratni vojni invalidi.

U toku prošle godine sportisti i sportski kolektivi općine Kalesija ostvarili su najbolje rezultate:

POJEDINAČNO:

1. **Mirza Tubić** iz Prnjavora, senior OK "Bosna" Kalesija koji je u prošloj godini sa svojim klubom igrao Premijer odbojkašku ligu Bosne i Hercegovine i polu-finale Kupa BiH,
2. **Semir Mujkanović**, iz Seljublja, senior u Fudbalskom klubu "Mladost" iz Kikača, najbolji nogometaš na području općine Kalesija,
3. **Zerina Suljić** iz Srebrenika, seniorka u Ženskom odbojkaškom klubu "Bosna" Kalesija, sa klubom je prvak prvog dijela takmičenja u Super odbojkaškoj ligi Federacije BiH,
4. **Senad Ibrahimović** iz Kalesije, junior u Klubu borilačkih sportova "Golden Team" Kalesija, balkanski vice prvak,
5. **Velida Hasanović** iz Sarača, juniorka u Karate klubu "Bosna-Kalesija", bila je treća na Balkanskom poluostrvu,
6. **Armin Atlagić** iz Kalesije Gornje, nogometaš, FK "Bosna" iz Kalesije, najbolji nogometni junior na području Općine Kalesija,
7. **Elma Mehmedović** iz Kalesije, kadetkinja u Klubu borilačkih sportova "Golden Team" Kalesija, Druga u Bosni i Hercegovini,
8. **Safet Križevac** iz Križevića, kadet, član FK "Bosna" iz Kalesije, najbolji kadet nogometaš na području Općine Kalesija,
9. **Huso Turić** iz Prnjavora, pionir, član Klubu borilačkih sportova "Golden Team" Kalesija, najbolji u Bosni i Hercegovini,
10. **Požegić Šemso** iz Rainaca Donjih, pionir, član ŠK "Bosna" Kalesija, prvi rejting igrač na Međunarodnom rejting turniru koji se rangira za evropsku listu šahista,
11. **Anela Spahić** iz Kalesije, pionirka u Ženskom odbojkaškom klubu "Bosna" Kalesija, najbolja pionirka Općine Kalesija,
12. **Amar Jahić**, iz Sarača, ciciban, Karate klubu "Bosna-Kalesija", najbolji na regiji,
13. **Naida Kulanić** iz Vukovija Gornjih, Cicibanka, član Karate klubu "Bosna-Kalesija", prvakinja Kantona,
14. **Enes Hasanović** iz Sarača, trener u Karate klubu "Bosna-Kalesija", najbolji trener na području Općine Kalesija u prošloj godini,
15. **Šefik Imamović** iz Vukovija Gornjih, proglašen najboljim nogometnim trenerom Općine Kalesija,
16. **Senad Mujkanović** iz Seljublja, Predsjednik FK "Mladost" iz Kikača najuspješniji sportski radnik u prošloj godini.

## KOLEKTIVNO

1. **ŽOK "Bosna" Kalesija**, seniorke, vice šampioni Super odbojkaške lige Federacije Bosne i Hercegovine u sezoni 2013/2014.godine i lideri u Super odbojkaškoj ligi Federacije BiH u prvom dijelu takmičenja u 2014/2015. godini,
2. **FK "Mladost" Kikači**, seniorska ekipa, Prvo mjesto u Drugoj nogometnoj ligi Tuzlanskog kantona kojim su obezbijedili prelazak u veći rang nogometnog takmičenja, Prvu nogometnu ligu Tuzlanskog kantona i pobjednici KUP takmičenja BiH za područje Općine Kalesija,
3. **FK "Krušik" Vukovije Gornje**, seniorska ekipa, Prvo mjesto u Trećoj nogometnoj ligi Tuzlanskog kantona kojim su obezbijedili prelazak u veći rang nogometnog takmičenja, Drugu nogometnu ligu Tuzlanskog kantona,
4. **FK "Bosna" Kalesija**, seniorska ekipa, pobjednici memorijalnog takmičenja "Kup Šehida Općine Kalesija",
5. **KK "Bosna" Kalesija**, juniori, lideri u Regionalnoj košarkaškoj omladinskoj ligi TK-a u prvom dijelu takmičenja u 2014/2015. godinu,
6. **FK "Bosna" Kalesija**, juniori, pobjednici Kup takmičenja BiH za područje Općine Kalesija,
7. **Karate klub "Bosna-Kalesija" Kalesija**, kadeti, Drugi na području Tuzlansko-posavske regije,
8. **ŽOK "Bosna" Kalesija**, pioniri, Prvi na području Tuzlansko-posavske regije,
9. **Nogometni klub-Škola fudbala "Respect" Kalesija**, pioniri najbolji na Općini, pjetlići pobjednici turnira "Respect kup Kalesija 2014" ,
10. **FK "Rainci Gornji" Rainci Gornji**, pjetlići, najbolji na Općini Kalesija,
11. **Karate klub "Bosna-Kalesija" Kalesija**, cicibani i cicibanke, prvavci regije Sjevero-istočne Bosne,
12. **OŠ "Memići"**, najbolji u takmičenju Malih olimpijskih igara na području Općine Kalesija,
13. **Organ uprave Općine Kalesija**, pobjednik je takmičenja u nogometu u okviru Radničkih sportskih igara Općine Kalesija i
14. **Novi bunar d.o.o. Kalesija**, pobjednik takmičenja u odbojci u okviru Radničkih sportskih igara Općine Kalesija.

Prošle godine na području općine Kalesija nije bilo formiranja novih sportski kolektiva.

Dva kluba; **FK "Mladost" iz Kikača**, prešao u veći rang takmičenja, u Prvu nogometnu ligu Tuzlanskog kantona, poslije osvajanja prvog mjesta u Drugoj nogometnoj ligi Tuzlanskog kantona, dok je **FK "Krušik" iz Vukovija Gornjih**, prešao u veći rang takmičenja, u Drugu nogometnu ligu Tuzlanskog kantona, poslije osvajanja Prvog mjesta u Trećoj nogometnoj ligi Tuzlanskog kantona. Za sportsko predstavljanje Općine Kalesija ponosno je istaći i postizanje individualnog rezultata u karate sportu koji, je u prošloj godini, ostvarila takmičarka karate kluba "Bosna-Kalesija" **Velida Hasanović**. Prvi put u historiji karate sporta u Kalesiji, kao BiH reprezentativka, osvojila je bronzanu medalju (treće mjesto) na Balkanskom prvenstvu održanom u Bugarskoj.

## **Zaključna posmatranja sportskog napredovanja:**

Neophodno je nastaviti sa afirmacijom rada mlađih kategorija po svim sportskim granama. Mnogi klubovi su imali oslonac upravo u podmlađenim sastavima i dobiveni su dobri rezultat koji će u narednim godinama biti još daleko veći. Takva strategija će oplemeniti svaki naš sportski kolektiv za kojim će ljubav naroda ovog kraja dvostruko biti uvećana, jer u takmičenjima nastupaju njihova djeca. Za ovo opredjeljenje potrebno je intezivirati rad sa mlađim kategorijama u svim našim klubovima.

Što se tiče sportskih rezultata ostvarenih u prošloj godini oni su iskazani u dobrom svijetlu ako se ima u vidu plasman OK Bosne u finale Kup takmičenja Bosne i Hercegovine. Zatim, FK Bosna i ŽOK Bosna iz Kalesije koji su cijelu prošlu godinu u svojim ligama igrali odlično što im je omogućilo trenutni liderski plasman u takmičenju. Također, dobre rezultate su postigli i klubovi borilačkih sportova u pjedinačnoj konkurenciji, uglavnom za mlađe kategorije, gdje ima i državnih prvaka pa i balkanskih pobjednika. Velika zainteresovanost istaknutih evropskih stručnjaka za sportsku budućnost talentovanog nogometaša Miralema Ramića, dijeta iz našeg grada je dobilo svoj epilog pa je ovaj talenat već dospio do Njemačkog prvoligaša Herte iz Berlina, a i još nekoliko naše djece iz kalesijskog sporta kandidati su državne reprezentativne selekcije i klubova visokog ranga takmičenja u Bosni i Hercegovini.

Potrebno je redovno iznalaziti i druga rješenja za kvalitetni razvoj sporta na području naše općine kroz stvaranje uslova za rad klubova koji trenutno egzistiraju, ali isto tako stvarati i uslove za rad novoformiranim klubovima kako bi sportska opredjeljenja djece mogla biti što veća.

Za značajniji iskorak unapređenja dvoranskih sportova neophodno je što prije staviti sportsku dvoranu u funkciju.

## ***KULTURA***

Izveštaj sa ocjenom stanja u kulturi općine Kalesija ima za cilj sagledavanja stanja u oblasti kulture na području naše općine i pregled osnovnih segmenata ove oblasti sa posebnim osvrtom na organizovanje kulture, stanje infrastrukture, stručnih kadrova, i materijalno-finansijskih uslova Javnih ustanova i Kulturno-umjetničkih udruženja.

Na području općine Kalesija u oblasti kulture djeluju JU BKC « Alija Izetbegović» i JU « Gradska biblioteka» iz Kalesije kao i pet Kulturno-umjetničkih društava: "Halisije" Kalesija, "14 Maj" " Tojšići, «Rainci Gornji» Rainci Gornji, «Biser» Tojšići , "7 April" Vukovije, a svoje djelovanje aktivno prezentuje i Amaterska scena iz Kalesije.

Sve aktivnosti koje su bile planirane u povodu Dana općine Kalesija za koje je bio priređen bogat kulturno- zabavno – sportski program nisu realizovane.

A razlog su elementarne nepogode i proglašavanja vanredne situacije pa su sve kulturno-sportske manifestacije otkazane kako bi se saučestvovalo sa građanima koji su pretrpjeli najveće štete nad svojim domovima i imanjinama..

### **«Smotra kulturno-umjetničkog stvaralaštva»**

I ove godine je organizovana «Smotre kulturno-umjetničkog stvaralaštva» za učenice i učenike osnovnih i srednjih škola naše Općine, sprovedena je po školama a ne kao centralna manifestacija a na kojoj je uzelo učešće oko 900 učenica i učenika.

Treba napomenuti da se svake godine održavaju dvije tradicionalne i zaista veoma popularne Kulturno-zabavno –sportske manifestacije, a riječ je o:

«**Tojšićkom ljetu**» i «**Kalesijskom ljetu**»

«**Tojšićko ljetu**» je u periodu od 08.06. do 31.08 2014 godine u svom programu sprovelo malonogometni, šahovski, košarkaški, odbojkaški i stonoteniserski turnir te tradicionalni turnir u velikom fudbalu.

Organizovan je koncert narodne muzike, Veče izvorne muzike, Veče ilahija i kasida, Humanitarni koncert i koncert " Tojšićani pjevaju Tojšićanima. Takođe je u okviru ove manifestacije održana i Smotra folkloru na kojoj je učešće uzelo 10 KUD-ova iz BiH.

**Kalesijsko ljetu**» Sve Aktivnosti ove manifestacije prikazane su u izvještaju o radu BKC-a « Alija Izetbegović» koji je i bio organizator ove manifestacije.

### **JU BKC « Alija Izetbegović»**

U odnosu na 2013. godinu zabilježen je manji broj aktivnosti. Tome je uveliko doprinijelo stanje elementarne nepogode koja je pogodila općinu Kalesija.

U organizaciji, suorganizaciji ili uz korištenje prostora, opreme i drugih resursa u Bosanskom kulturnom centru „Alija Izetbegović“ Kalesija održano je 60 aktivnosti/manifestacija.

Stanje prirodne nesreće u maju 2014. godine je otežalo rad svih institucija pa tako i JU BKC „Alija Izetbegović“ Kalesija koja je i pored toga činila i čini velike napore na očuvanju i promociji kulturne baštine naše Općine.

U 2014. godini nastavilo se sa održavanjem tradicionalnih manifestacija koje su postale već prepoznatljivije, a to su u prvom redu Kalesijsko ljetu i Festival izvorne muzike. Nastavilo se i sa održavanjem Kalesijske likovne kolonije, 3D projekcijama igranih i animiranih filmova, izložbama slika, promocijama knjiga, održavanjem kulturno zabavnih sadržaja, te obilježavanjem značajnih datuma za općinu Kalesija..

Kao osvježenje u 2014. godini izdvaja se gostovanje renomirane grupe Divanhana koja na originalan način i u skladu sa aktuelnim muzičkim izražajima obrađuje tradicionalnu bosansku pjesmu – sevdalinku.

U 2014. godini najviše pažnje je posvećeno pripremi i održavanju naših tradicionalnih manifestacija – Kalesijsko ljetu i Festival izvorne muzike, kao i Kalesijske likovne kolonije koja je održana četvrti (4.) put. Kulturno-zabavna manifestacija Kalesijsko ljetu je počela 01. 08. i trajala do 30. 08. 2014. godine. U okviru iste održano je osam (8) aktivnosti, počev od muzičkih večeri, nastupa kulturno-umjetničkih društava, projekcija filmova, izložbi umjetničkih radova i drugih manifestacija.

Kalesijska likovna kolonija održana je 21. i 22. juna, a okupila je 30 umjetnika iz cijele BiH.

Jubilarni deseti po redu Festival izvorne muzike održan je 06. 11. 2014. godine. Nastupilo je sedam (7) izvornih grupa a Festival će ostati upamćen po posthumnoj dodjeli priznanja rahmetli Hasanu Šabanoviću, osnivaču grupe Kalesijska trojka koja se smatra i začetnicom izvorne muzike na našim prostorima. Da se radi o ozbiljnom projektu govori i činjenica da je izvorna muzika i zvanično proglašena kulturno-historijskim naslijeđem, što daje dodatnu dimenziju i obavezuje na ozbiljniji pristup pri organizaciji Festivala izvorne muzike.

Na osnovu podataka navedenih u sledećoj tabeli vidljivo je da je održano najviše muzičkih/muzičko-scenskih aktivnosti te da su iste, samim tim, i okupile najviše posjetilaca. Pod ovim aktivnostima se misli na muzičko-scenske performanse, festivale, muzičke večeri na otvorenom u sklopu Kalesijskog ljeta, i slične aktivnosti. Ovdje se svakako, izdvaja Festival izvorne muzike, jedinstven u Bosni i Hercegovini.

*Tabela: Broj aktivnosti prema vrsti i broju posjetilaca*

Aktivnost	Broj događaja	Broj posjetilaca
Izložbena	4	450
Pozorišna	7	950
Književna	7	970
Kinematografska	10	877
Muzička/muzičko-scenska	13	2050
Ostalo	8	700
Ukupno	49	5997

## **JU «Gradska biblioteka» Kalesije**

Na polju afirmacije kulture i knjiga u 2014.godini je upriličeno 20-ak promocija i drugih javnih i kulturnih događaja čime je Gradska biblioteka među najaktivnijim na području Tuzlanskog kantona.

Najznačajniji kulturni projekti biblioteke u 2014.godini realizovani su uglavnom u povodu 23.aprila-Svjetskog dana knjige ili u okviru kulturnih manifestacija "Dani povelje" i "Ikre" kao i ljetni sajam knjige, te literalni natječaj "Zavičajna priča"

U cilju podizanja kulturnih standarda, Gradska biblioteka Kalesije je pokretač mnogih sadržaja u cilju popularizacije knjige i kulture čitanja, izdavačke djelatnosti i kulturne manifestacije sa književnim, historijskim i društvenim temama sa ukupnim fondom od cca 18.200 bibliotečkih jedinica, ukupan korisnika iznosi 1950, a godišnje ima oko 800 aktivnih članova. Većinu čine učenici i studenti u korištenju obavezne i stručne literature za obrazovni proces, kao i kvalitetnu ponudu za široko interesovanje građanstva.

U prethodnoj 2014. godini Gradska biblioteka je pored zadataka iz matične djelatnosti, realizovala preko 20 promotivnih kulturnih sadržaja.

Što se tiče književnosti u ovoj godini zabilježeni su sledeći kulturni sadržaji:

- Održana promocija knjige kalesijskog književnika Mehmeda Đedovića "Čaj od nane".
- Susreti kluba čitalaca
- Obilježen 21.februar- Međunarodni dan maternjeg jezika
- Obilježen 21.mart svjetski dan poezije kulturnim događajem "Pjesmom da ti kažem"
- Obilježen 23.april- svjetski dan knjige u povodu čega je održana press-konferencija na kojoj je predstavljen projekat literalnog natječaja za izbor najbolje kratke priče pod nazivom "Zavičajna priča"
- Promocija Monografije OŠ Kalesija autori Fahrudin Hamzić i Zlatan Paloš
- Ljetni sajam knjige u Kalesiji, predstavljanje izdavača

- U mjesecu oktobru organizovana 18. kulturna manifestacija «Ikre»
- Promocija romana "Sjene crvenih joha" autora Azira Šabića
- U okviru manifestacije " Vezeni most"u Kalesiji su gostovali književnici: Zlatko Dukić, Adnadin Jašarević i Nura Suljkanović.
- Predstavljanje knjige " Traganje za istinom"autora Esmira Bašića
- Promocija zbirke priča " Ko još pjeva dok umire" autora Fajke Kadrića

Pored kulturnih manifestacija, tradicionalni karakter poprimio je i otvoreni Ljetni sajam knjige koji se održava već tri godine i koji je pokazao korisne efekte. Obzirom da kroz predstavljanje izdavača i promociju bibliotečkog fonda doprinosi jačem interesu građana za knjigom i čitanjem, te povećava broj korisnika usluga gradske biblioteke. Takođe biblioteka je dala značajan doprinos i podršku u pokretanju izdavačkih projekata koji tretiraju lokalna kulturno-istorijska i društvena pitanja ustupanjem pisane građe za izradu monografskih publikacija( Miljanovci, Vukovije, sarači, Kikači, Jajići i Prnjavor). Pokrenuta je akcija " Kalesija pomaže Bužimu" – prikupljanje knjiga za biblioteku u Bužimute je realizovan projekat " Kalesijski šampioni znanja"i pomoć u organizaciji kulturno-vjerske manifestacije" Dovište Pašin put-Orlić" koja se održala u Hajvazima.

## **Rad KUD-ova**

Od Kulturno umjetničkih društava na našoj općini egzistiraju; "14 Maj " Tojšići, «Biser " Tojšići ", "Halisije" Kalesija «Rainci Gornji» Rainci Gornji, i "7 April" Vukovije Donje

**GKUD "Halisije " iz Kalesije**, imali su nastupe na ; Smotrama folkloru Brka, Tojšići, Konjic, Gradačac(Vučkovci), te smotrama dječijeg folkloru Živinice i Rainci Gornji i gostovanje na feestivalu u Vukovijama Donjim.

Imali su nastup u emisiji "OTV Bijeljina" .Takođe sve značajnije manifestacije i događaje važne za općinu Kalesiju su propratili sa svojim programom kao što je Kalesijsko ljeto, Tojšićko ljeto, obilježavanje Dana državnosti BiH. Organizovali su VI Internacionalnu Smotru folkloru općine Kalesija, nastupali su i na humanitarnim koncertima.Učestvovali su na Internacionalnom festivalu Braunau u Austriji.

**"14 Maj " Tojšići** – Učestvovali su na Internacionalnoj Smotri folkloru u Rumuniji (Brašov), na Međunarodnoj smotri folkloru u Čituku, te na Smotrama folkloru u Kalesiji, Brčkom, Puračiću, Dobrnja i Vukovijama Donjim.Takođe sve značajnije manifestacije i događaje važne za općinu Kalesiju su propratili sa svojim programom kao što je "Kalesijsko ljeto", "Tojšićko ljeto"nastupi za Dan državnosti.Organizovali su i devetu po redu Smotru folkloru u Tojšićima gdje je nastupilo deset Kulturno-umjetničkih društava iz cijele BiH.A nastupali su i na humanitarnim koncertim.

**"7 April" Vukovije Donje** svoje nastupe imali su: na međunarodnoj smotri folkloru u Kalesiji, u Višnjevu kod Travnika te na smotrama folkloru u Tojšićima, Raincima Gornjim,u Vučkovcima općina Gradačac i učešće na kulturno-zabavnoj manifestaciji u Čeliću.

Imali su nastupe u okviru obilježavanja Dana državnosti, Dana nezavisnosti BiH, i u povodu vjerskih praznika, zatim dana MZ i KUD-a kojom prilikom su organizovali smotru folkloru na kome je učešće uzelo pet kulturno-umjetničkih društava sa područja Tuzlanskog kantona,

**"Biser " Tojšići** U 2014. godini su organizovali više zabavnih večeri gdje su im gosti bili GKUD "Gornji Rahić", KUD "Bihor" Petnjica iz Crne Gore, te hor Ridvan Rainci Gornji. Imali su i gostovanja van granice BiH tako da su nastupali na Saboru frulaša i folkloru u

Bogatiću u Srbiji, zatim međunarodnoj smotri folkloru u Donjem Miholjcu u Hrvatskoj i na dva gostovanja u Mađarskoj i Luxemburgu.

Na domaćoj sceni predstavili su se na smotri folkloru u Raincima Gornjim, Goraždu, Rahić Gornji i Vitezu, te učešće na otvaranju likovne kolonije "Klik Đžafići".

Organizovali su II međunarodni festival folkloru "Susreti prijatelja" Tojšići gdje su pored domaćih kulturno-umjetničkih društava bili i gosti iz Srbije-Bogatić, te dva društva iz Hrvatske iz Podravske Moslavine i Donjeg Miholjca. A imali su nastupe u povodu obilježavanja Dana nezavisnosti te učešća na Tojšićkom ljetu i obilježavanja vjerskih praznika

### **KUD « Rainci Gornji »**

u 2014. godini imao je nastupe na festivalima i smotrama folkloru u BiH, a nastupa van granica BiH u 2014. godini nisu imali iz razloga što je menadžment KUD-a imao za cilj da njihovi članovi upoznaju ljepote BiH te da steknu nova prijateljstva u gradovima širom BiH.

Imali su nastup na Internacionalnom festivalu u Kalesiji, smotri folkloru Tojšićima, nastup na godišnjici KUD-a "7 april" Vukovije Donje, nastup u Višnjevu kod Travnika, nastup na godišnjici KUD-a "Priluk", nastup na Konjičkoj sehari, i na smotri folkloru u Brijesnici Maloj. KUD "Rainci Gornji" je u prethodnoj godini organizovao I međunarodnu smotru dječijeg folklornog stvaralaštva u Raincima, gdje su svoje učešće pored domaćina uzela i druga društva sa područja općine i TK i susjedne države Hrvatske.

### **Informisanje**

Informisanje kao sistem obavještanja svih građana o političkim i drugim pitanjima koji služe unapređenju rada i podizanja kvaliteta života, predstavlja čitav niz građanskih prava među kojima su: Sloboda misli, sloboda izražavanja misli, slobodu štampe i drugih oblika javnog obavještanja, pravo na istinitu, potpunu i blagovremenu informaciju bez obzira na granice i sredstva informisanja.

Na području općine Kalesija građani se informišu, imaju pravo da upute kritike i traže objašnjenja putem:

-Nezavisnog radija "Feral" koji već duži vremenski period putem radija informiše i obavještava građane Kalesija o navedenim činjenicama.

-Nezavisni portali: Kalesija Online, Nezavisni Kalesijski portal "Nama nije svejedno" i Kalesijske novine, putem internet stranica informiše i obavještava građane Kalesija o navedenim činjenicama.

-Neon televizija koja je počela sa radom putem televizije informiše građane Kalesija o navedenim činjenicama.

-Građani Kalesija u ostvarivanju svojih prava u općinskim službama mogu zatražiti informacije na infopultu koji je otvoren u šalter sali općine, kao i ostale informacije koje se mogu tražiti zahtjevima u skladu sa Zakonom o slobodi pristupa informacijama.

## **Z a k l j u č a k:**

Stanje sporta i kulture na području općine Kalesija je na zadovoljavajućem nivou sa tendencijom da od sporta u narednom periodu možemo očekivati i više. U prošloj godini rapidno se smanjio broj sportista tinejdžerskog uzrasta u gotovo svim klubovima na području lokalne zajednice. Potrebna je detaljnija analiza razloga zbog čega se dogodio ovaj, drastični pad broja mladih u sportu. Ali sama činjenica da će u skorije vrijeme biti poboljšani uslovi za bavljenje dvoranskim sportom ulijeva nadu da bi u sadašnjim i nekim buduće formiranim granama sporta mogli povećati broj sportista na području općine, a i rezultati bi mogli biti bolji.

Primjetno je da se sve više mladih osoba uključuje u rad Kulturno-umjetničkih društava, odnosno da je trenutno u ekspanziji rad sa folklornim grupama koje svojim nastupima na domaćoj i međunarodnoj sceni plijene pažnjom i našu tradiciju oživljavaju na najbolji mogući način

U odnosu na prethodnu godinu primjetan je veliki broj ne realizovanih a planiranih aktivnosti i manifestacija kako na polju sporta tako i u oblasti kulture. Osnovni problem se ogledao u proglašenju elementarne nepogode koja se desila u mjesecu maju kada je Pprogramom rada Općinskog načelnika bilo i planirano da se sprovedu gore navedene aktivnosti. Međutim elementarne nepogode nisu uticale na kalendar takmičenja sportskih ekipa tako da su sva ligaška takmičenja sprovedena bez prekidanja ili prolongiranja istih.

Služba za opću upravu, boračko- invalidsku  
zaštitu i raseljena lica općine Kalesija

Federacija Bosne i Hercegovine  
Tuzlanski kanton  
OPĆINA KALESIJA  
OPĆINSKI NAČELNIK  
Služba za opću upravu, boračko  
Invalidsku zaštitu i raseljena lica  
Broj: 02/4 -1-05-1848 /15  
Kalesija; 18.06.2015. godine